

Г.Х. Төлекова¹, Г.Х. Төлекова²

¹«Тұран» университеті филология ғылымдарының кандидаты, доцент

²Азаматтық Авиация академиясы филология ғылымдарының кандидаты, профессор

АБАЙ, ШӘКӘРІМ ШЫҒАРМАЛАРЫНДАҒЫ ҰЛТТЫҚ ЕРЕКШЕЛІКТІ ЕСІМДІ СӨЗ ТІРКЕСТЕРІНІҢ ГРАММАТИКАЛЫҚ ҚҰРЫЛЫМЫ ЖӘНЕ ОЛАРДЫҢ ТАНЫМДЫҚ МӘНІ

Аннотация: Сөз тіркестері құрылымындағы семантикалық даму бағытын айқындауға негіз болатын алғышарттардың бірі – қатысымдық үдеріс. Сөз тіркестеріндегі мағыналық, құрылымдық өзгерісті Абай, Шәкәрім шығармаларының материалы негізінде қарастыру олардың мақсатты түрдегі жұмсалуын, тек семантикалық мәселелерді шешуге емес, лингвистикалық семантика мәселелеріне бағытталғандығын анықтауға мүмкіндік береді. Бұл бүгінгі қоғамдық өркениеттің өзектілігіне өріс алатын факторлардың біріне айналған. Олай дейгініміз, сөз тіркестері құрамынан туатын қатысымдық мағына тілдік және тілден тыс ақпараттық білім жиынтығын құрап, сөз тіркесі семантикасының функционалдық қызметін саралауға негіз болып табылады.

Тірек сөздер: шығарма, фактор, үдеріс, қорытынды, когнитивті лингвистика, коммуникативтік үдеріс, сөз тіркес, функционалдық ақпараттық білім.

Г.Х. Төлекова¹, Г.Х. Төлекова²

¹кандидат филологических наук, доцент университета «Туран»

Алматы, Казахстан

²кандидат филологических наук, профессор Академии гражданской авиации

Алматы, Казахстан

ГРАММАТИЧЕСКОЕ СТРУКТУРА СЛОВСОЧЕТАНИЙ С НАЦИОНАЛЬНЫМИ ОСОБЕННОСТЯМИ В ПРОИЗВЕДЕНИЯХ АБАЯ, ШАКАРИМА И ИХ ПОЗНАВАТЕЛЬНОЕ ЗНАЧЕНИЕ

Аннотация: Одной из предпосылок, лежащих в основе определения направления семантического развития в структуре словосочетаний, является коммуникативный процесс. Рассмотрение смысловых, структурных изменений в словосочетаниях на материале произведений Абая, Шакарима позволяет определить их целенаправленное использование, ориентированное не только на решение семантических задач, но и на вопросы лингвистической семантики. Таким образом, коммуникативное значение, возникающее из состава словосочетаний, является основой для дифференциации функции семантики словосочетания, образуя совокупность языковых и внеязыковых информационных знаний.

Ключевые слова: произведение, фактор, процесс, заключение, когнитивная лингвистика, коммуникативный процесс, словосочетания, функциональные информационные знания.

G.H.Tolekova¹, G.H.Tolekova²

¹Candidate of Philology, Associate Professor, University «Turan»
Almaty, Kazakhstan

²Candidate of Philology, Professor of the Academy of Civil Aviation
Almaty, Kazakhstan

GRAMMATICAL STRUCTURE OF PHRASES WITH NATIONAL PECULIARITIES IN THE WORKS OF ABAI, SHAKARIM AND THEIR COGNITIVE MEANING

Annotation: One of the prerequisites underlying the determination of the direction of semantic development in the structure of word combinations is the communicative process. The consideration of semantic and structural changes in word combinations based on the material of the works of Abai and Shakarim allows us to determine their purposeful use, focused not only on solving semantic problems, but also on the issues of linguistic semantics. Thus, the communicative meaning arising from the composition of phrases is the basis for the differentiation of the function of the semantics of the phrase, forming a set of linguistic and extra-linguistic information knowledge.

Keywords: composition, factor, process, conclusion, cognitive linguistics, communicative process, word combinations, functional information knowledge.

А.Байтұрсынұлы: «Абайды қазақ баласы тегіс танып білуі керек... Абай сөздері дүнияде қалғаны – қазаққа зор бақ»[1, 301 б.] – деп аса құнды артқыға қалдырған сөздерді ұрпаққа ұран деп тануға болары рас. Абай мен Шәкәрім көтерген мәселелер ұлттық құндылықтарды ғана құрамайды, жалпы адами мәселелерді де қозғайды. Осы адамзатқа тән рухани байлық болып табылағын дүниені сөз тіркесі, оның есімді басыңқылы тұлғалары арқылы танып, тарату мақаланың өзегі болып отыр. Сөйлем құрамына енген сөздер бір-бірімен белгілі синтаксистік тәсілдер арқылы байланысып, мағыналық үйлесімдер негізінде тізбектеледі [2, 49 б.]. К.Шаукенов «Синтаксис» атты еңбегінің «Сөз тіркесінен сөйлем жүйесіне барар жол» деген тарауында: «Белгілі бір ойды білдіруде жеке сөзден сөйлемге дейінгі аралықтағы байланыстылық заңдылығы сөз тіркесін құрайды. Сонда сөз тіркесі, сөздер сөйлем құраудың заңдылығы болады, ол заңдылық болмаған жерде сөйлем де болмайды», – деп, сөз тіркесінің сөйлем құрауға материал [3, 10 б.] болағындығы жөніндегі С.Аманжоловтың пікірін қуаттайды.

Абай:

Кейде *есер көңіл* құрғырың,

Махаббат іздеп талпынар.

Ішсем деп бейнет сусынын

Ассу жүрек алқынар! –

деп, «жастықтың отын» іздеп, шарқ ұрады. Абай шығармаларының «махаббат» концеп-

тісіне қатыстылығы шын достық пен неге болса да адал махаббат болуын насихаттаудан тұрады.

*Көзімнің қарасы,
Көңілімнің санасы.
Бітпейді іштегі,
Ғашықтық жарасы, –*

деген жолдардағы есім басынқылы тіркестер де «махаббат сезімін» паш етеді.

Сонымен қатар, екі жастың немесе қос ғашықтың арасындағы махаббаттың кіршіксіз таза, пәк болуын да өлеңге арқау етті. Оған Абайдың Пушкиннен аудармасын: «Евгени Онегині», «Татьянаға хаты» шығармаларының мазмұнынан көруімізге болады. Ақын орыс поэзиясының алыбы Пушкиннің шығармасын қазақша аударып отырып, оны қазақтың төл шығармасындай сөйлете білді. Ақын көңіліне жақын келген Евгений мен Татьяна арасындағы шынайы махаббатты жырға қосты. Ондағы «*кінәсі жоқ жас адамды*», «*елжіреген жас*», «*ғашыққа мас*» есімді тіркестері ғашықтық жалынын анық білдіріп тұрса, «*жаралы жолбарыс*», «*киіктің лағы*» есімді тіркестері – метафоралы сөзқолданыстары. Сөйтіп, бірін-бірі сыйлап, сүйіп өткен қос ғашықтың махаббаты арқылы қазақ даласындағы жастардың өмірі мен махаббатын үндестіре отырып, көркем сөзбен кестеледі. Демек, «махаббат» концептісін Абай шығармаларының өн бойынан толықтай кездестіріп отыруға болады. Ал ақын шығармасындағы «махаббат» концептісі адамдар арасындағы көңіл тазалығы, пәктік, шынайылық, құрметтеу, ізгілік, сену т.б. адами қасиетке тән когнитивтік модельдерден тұрады.

Абайдың табиғат туралы өлеңдеріндегі көркем бейнелер – сыртқы және ішкі дүниенің шынайы үйлесімділігінен туған бейнелер. Абайдың табиғат туралы өлеңдерінде де табиғаттың мінезі секілді әртүрлі мінездегі көңіл-күй, сезім иірімдері көрініс береді. Мысалы, Абайдың «Жаз» өлеңінде:

*Жаздың көркі енеді жыл құсымен,
Жайраңдасып жас күлер құрбысымен, –*
деп, ақынның көңіл күйі ішкі таным-түйсіктерінің бір уақыт байыз тауып, толысқан, кемеліне келген сәтін бейнелейді. Немесе:

*Жазғытұры қалмайды қыстың сызы,
Масатыдай құлпырар жердің жүзі.
Жан-жануар, адамзат анталаса,
Ата-анадай елжірер күннің көзі, –*

деген өлең жолдарында есімді тіркестер табиғат тамашасын одан әрі әрлендіре түскендей.

Уақыт өлшемін бейнелеуде қолданылған *-ған* көсемшесі де ақынның сол бір кезге деген сағыныш, аңсауының, қимастық сезімінің кілті сияқты: «Жаздыгүн шілде болғанда, Көкөрай шалғын, бәйшешек, Ұзарып өсіп толғанда; Күркіреп жатқан өзенге, Көшіп ауыл қонғанда». Осылайша басталған өлең суреті енді *ын/ін/н* көсемшелері арқылы ойнақы, динамикалық сипат алады. Өлеңнің соңғы шу-мағына келгенде осы ырғақ үзіліп, «Өткен күннің бәрі ұмыт, Қолдан келер қайрат жоқ» екенін «байғұс шалдың» бейнесімен тұжырымдайды. Мұндағы көңіл күйді жеткізуде өлеңнің ұйқасымен бірге *-ған, -ген, -ын, -ін, -н* қосымшаларының мағынасы мен қызметі абстракцияланып, ерекше танымдық стилемаларға айналған.

Жоғарыда да сөз болған қазақ халқының ертеден қалыптасқан моралі «*Малым жанымның садағасы, Жаным арымның садағасы*» деп *ар, ұят, иман* қасиеттерін жаннан артық бағалап, «*өлімнен ұяттың күшті екендігін*» қоғамда, тәрбиеде басты қағида етіп ұстанған.

Абайдың осы *Алланың өзі* де рас, *сөзі* де рас деп басталатын өлеңінде және отыз алтыншы, отыз сегізінші қара сөздерінде *ар* мен *иманды* түсіндіруде араб сөздерін дәл Құран тілінде берілуімен қолданып, оның мән-мағынасын қазақтың поэзия тілімен немесе қара сөздерінде шешендік үлгісімен береді.

Абай мен Шәкәрім шығармаларындағы ең ірі концептілік жүйе құрай алатын концепт – өмір, өлім, Алла, ар-ұят, махаббат, иман т.б. тұжырымдасы. Олар эпитет, теңеу сияқты көріктеу құралдары арқылы, сондай-ақ еркін сөз тіркестері, оның ішінде есімді және етістікті сөз тіркестері арқылы көрініс табады.

«Ұятың, арың оянсын, Бұл сөзімді ойласын», «Адамдық борыш ар үшін, Барша адамзат қамы үшін», – деп өз өлеңдерінде қайталанып отыратын жалпыадамзаттық адами мәселелер – Абай мен Шәкәрім шығармаларының өзекті тақырыбы.

Абай мен Шәкәрім шығармаларындағы адамды ізгілікке жұмылдырудың барысындағы адамдық моральды көрсететін «ар-ұят» концептісі бинарлық жұп ретінде қатарласып қолданылады. Адамдық асыл қасиетті көрсететін этиканың өлшемі – ар мен ұят бірін-бірі толықтырып отыратын құбылыстар. «Ар-ұят» концептісінің Абай мен Шәкәрім шығармаларындағы қолданысына тоқталатын болсақ, ағайынды ақындар «ар-ұят» концептісін жырға қосу барысында ерекше образды сөздермен беруімен қатар танымдық ерекшелігін де баса көрсете отырып, дидактикалық негізге қосады.

«Ар-ұят» концептісі ақындар өмірімен өзектес күрделі концепт екендігін тікелей олардың өмірімен сабақтастыра қарастыру барысында көптеген танымдық ақпараттар алуға болады. Мәселен, «мыңмен жалғыз алысқан» Абай, өз ұлттының көзі ашық, көкірегі ояу халықтар санатынан көрінуі үшін шарқ ұрып шырылдаған үніне бүгінгі ұрпақ та бейхабар емес.

Халқымыздың тілі де, өнері де, тарихы да, ғылымы да, тіршілік харекеті де, ойы да Абай шығармаларын үлгі етеді. Абай шығармашылығының негізі адамның ар-ұятын оятағын, нұр сәулесінің шапағаты. Қазақ халқы «талапты ерге нұр жауар» десе, сол жауаптан нұрдың көзін Абай даналығынан кездестіреміз. Абай шығармаларында адамдықтың өлшемі арды ақтамауға, ұятты сақтауға жанын сала жырлағанын көруімізге болады. Абай арқылы арды тану барысында Абайдың ұлылығын ұғынғанның үстіне ұғына түсетініміз күн санап ұлғаймаса, кемімегенін көруімізге болады. Абайдың: «Жүрегімнің түбіне терең бойла, Мен бір жұмбақ адаммын, оны да ойла» деуінің сырын осыдан аңғаруға болады. Абайдың бұл жұмбағын өзара түсіне білу, бағыл, санасы көреген, бағыл көзді, ақыл, қайрат, жүректі бірге ұстаған дарынды түсіну, ол бір ғана адамның, бір саладағы істейтін адамдардың қолынан келмейтінін байқауға болады.

Абайтану ісіне, оның өзі айтқандай, қиғаш келмей, тура, сыңаржақтамай, айна-қатесіз, әділ жүрекпен, таза ниетпен түсіну керек. Шыншыл, ғаділетті Абай есімін атақ үшін, мансап үшін пайдалану адамдық ардың алдында зор қылмыс болмақ.

Адамның барлық іс-әрекетін армен байланыстыру, ұятты, арлы адамды төбеге көтеру орынды. Бұл жөнінде хакім Абай:

Ары бар, ұяты бар үлкенге сен,

Өзі зордың болады иығы зор.

Ата-ананың қызығынан ғапыл қалма, – десе, енді бірде:

Ақыл керек, іс керек, мінез керек,

Ер ұялар іс қылмас болса керек, –

деп, «ар-ұят» концептісінің қатар жүретіндігін көрсетеді. *Ар-ұят* концептісінің негізінде

адамдықтың қалыптасатындығы, сонымен қатар «ар-ұят» концептісі жалпы халықтық сипат алуымен қатар, этникалық ерекшелікте болатындығын көруімізге болады. Қазақ халқы «ар-ұят» концептісін ерекше қастерлеген күрделі адамилықты танытатын бірліктердің қатарына жатқызады. Демек, Хакім Абай мен інісі Шәкәрімнің «ар-ұятты» жырға қосып, осы үшін жұртқа өнеге, көпке үлгі болғандығын көруімізге болады.

Хакім Абайдың ар болған жерде арсыздықтың болатындығын, ұят болған жерде ұятсыздықтың болатындығын, бұлар біріне-бірі қарама-қарсы құбылыстар екендігін көрсетеді. Абайдың «Сабырсыз, арсыз, еріншек» атты өлеңінде:

Өзін-өзі күндейді,
Жақынын жалған мінейді,
Ол – арсыздық белгісі.
Ұятсынбай, ойланбай,
Іс қылмай ма үлгісі... –

десе, енді бірде:

Ынсап, ұят, ар-намыс, сабыр, талап –
Бұларды керек қылмас ешкім қалап, –

деп, «ар-ұят» дегенді көп ешкім қалай бермейтіндігін сөзбен айтқанымен, ісінде ұяттың «қылаудай» ғана нышаны көрінбейтіндігін тебірене жырға қосады.

«Ар-ұят» концептісінің қатарын намыс, ақыл, қайрат, жігер, адамгершілік т.б. макро фреймдер қатары толықтыра түседі. «Ар-ұят» концептісі туралы ағайынды ақындар толғанғанда олардың қатарына міндетті түрде жоғарыда айтылған макро фреймдерді біріктіре жырға қосады. Олар өзара бір-бірімен байланысқа түсіп, бірін-бірі толықтырып отыратын адамилық бірліктер ретінде қарастыруға болады.

Бұл арадағы бірліктерді Абай шығармаларында жеке біреулерге арнауында көбіне кездесіп отырады. Мәселен, «Күлембайға» деген өлеңінде:

Қайтпін көмек болады,
Антұрған өңкей ұры-қар!
Көргенім әлгі, ойлашы,
Ұят-намыс қалды ма ар!

Немесе:

Көзінен басқа ойы жоқ,
Адамның надан әуресі.
Сонда да көңлі тым-ақ тоқ,
Жайқаң-қайқаң әрнесі, –

деген жыр жолдары «ар-ұят» концептісінің бірліктері мен надан «көңілі» мен «әрнесінің» өзара сабақтастықта екендігін анық көруімізге болады.

Адамдықтың өлшемі «ар-ұят» концептісі туралы күрделі адами қағынастарды Абай мектебі одан әрмен қарай кеңіте, молықтыра отырып, дидактикалық негізге құрып, жырға қосқандығын Шәкәрім шығармаларымен тығыз байланыста қарауымызға болады. Бұл тұрғыдан келген де Шәкәрім реализмі – Абай реализмінің заңды жалғасы болып табылады. Шәкәрімде болашақ дамудың бірден-бір жолы «ғылым мен өнер үйрену, еңбек ету, бірлікті сақтап, тірлікті жалғастыру, озық елдерден үлгі алу» деген байламға негізделіп, кеңінен жырға арқау болады. Саналы түрде бұндай жетістікке жету үшін биікте тұрған бірінші мәселе – ар мен ұятқа тіреледі.

Абай өзінің қазақтың мақал-мәтелдерін сынға алған 29-шы қара сөзінде «Жарлы болсаң, арлы болма» дегенді келтіріп, «Ардан кеткен соң, тірі болып жүргені құрысын»

деген байламға келеді. Арды ысырып қойып жинаған байлықты тек нағыз арсыздар болмаса, бойында намысы, ұяты бар адамның өзі тыюы қажет-ақ.

Нақты осы «ар-ұят» концептісі туралы Абай мен Шәкәрім шығармаларындағы ой үндестігі мен дәстүр жалғастығын мынадай жерлерінен көруімізге болады. Абай:

Өз ойынды ар емес,
Ынсап, ұят, терең ой,
Ұятың, арың оянсын, –

десе, Шәкәрім:

Ар қайда, ақыл қайда, намыс қайда,
Өңкей итке жалындың табыс қайда?
...Арсыз, ғайбат, өгірік, ынсапсыздық –
Бұлардан бой тасалап ақталалық, –

деп, Шәкәрім арсыздықтан аулақ болуға шақырса, Абай адам санасындағы ар-ұятты оятуға әрекет етеді.

«Ар-ұят» концептісі қоғаммен тікелей байланысты қоғамдық құбылыстардың да қатарына жатады. Абайдың:

Ары бар, ұяты бар үлкенге сен,
Өзі зордың болады иығы зор, –

деген өлең жолдары Шәкәрімде өз жалғасын былайша табады:

Бостандық таңы атты, қазағым, көріндер,
Арға ие басшының соңына еріндер, –

деп, ел бастаған азамат арлы болса, артына еруді насихат етеді.

Абай мен Шәкәрім шығармаларындағы дәстүр жалғастығын қарастыруда Абай мектебі тек Абай үлгісімен ғана жүріп-тұрды деу ағаттық болады. Себебі Абай шәкірттерінің қоғамы басқа қоғамдық құбылысты басынан өткерді. Сол себептен де олардың шығармаларының арасында кейде айырмашылықтар да кездеседі. Абай:

Атаны бала андиды, ағаны – іні,
Ит қорлық немене екен сөйткен күні.
Арын сапқан мал үшін антұрғанның,
Айтқан сөзі құрысын, шыққан үні.
...Ұятың мен арыңды малға сатып,
Ұятсыздар иман жоқ, түпке жетер, –

десе, Шәкәрім:

Арың сапта, терің сап, адалды ізде,
Ғибадат пен адалдық, ар үшін жи...
... Ардақтаған ата-анам малға сатты,
Қазы бұзды ұялмай шарифатты, –

деген өлең жолдарында мал емес, ар жиюды жырға қосса, ар сатудан өткен сорақылықты тебірене отырып, адам танымына ерекше әсер етерліктей етіп жырлайды. Дәл осындай өлең шумақтарын ағайынды ақындардың келесі бір жыр жолдарын мынадай бір нұсқада кездестіреміз. Абай да:

Сөз айттым, Әзірет Әлі, айдаһарсыз,
Мұнда жоқ алтын шек сары ала қыз.
Кәрілікті жамандап, өлім тілеп,
Болсын деген жерім жоқ жігіт арсыз, –

десе, Шәкәрімде:

Сақтық, ұят, рахым, ар,

Ынсап деген кәрің де, –

деген жыр жолдарынан «ар-ұятты» үлгі-өнеге тұту кәрілерден, танымдық әлемі жетілген жандардан бастау алатындығын тілге тиек етсе, бұл ойды Шәкәрім де растайды. Абай өзінің 18-ші қара сөзінде: «Тегінде, адам баласынан ақыл, ғылым, ар, мінез деген нәрселерден озады», – десе, Шәкәрім бұл тұрғыда былай деп жазады:

Харекет жоқ, ғылым жоқ,

Өз бойынан ұялмас.

Абай:

Арын сағып, ант ұрып, іздегені –

Бір семіз ат, аяғы бір табақ ас.

Шәкәрім бұл тойымсыз нәпсі, тұрақсыз дүние хақында:

Жалғанның бір пайдасын көргенде,

Арланбай арынды да сагасың.

Абай мен Шәкәрім шығармаларының ішіндегі «ар-ұят» концептісі адамның адамдығын қалыптастырушы лингвокогнитивтік және дидактикалық бірліктердің қатарына жататындығын көрсетеді. Лингвокогнитология ғылымының бір ерекшелігі тілді таза когнитологиялық сипатта қарастыру барысында адам танымына стилистикалық бояма мағына арқылы да ерекше әсер етеді. Қазақ поэзиясының алып бәйтеректерін бүгінгі ұрпақтың «ар-ұятты» шығармаларының өзекті тақырыбы етіп, ой толғап, сыр шертіп, оқырман қауымға терең ой тастаған Ұлы Абай мен Шәкәрімді мәңгілік естерінде сақтайтыны жүрекке жылу ұялатады. Сөзіміздің соңын Абай мен Шәкәрім сөздерімен өрбітсек:

Жанымен сүйді әділет, ардың жолын,

Сондықтан ол иесі терең ойдың, –

десе, енді бірі:

Өлді деуге сия ма, ойлаңдаршы,

Өлмейтұғын артына сөз қалдырған, –

деген даналық ділмәр сөздері халық жадында берік орнығып қалатындығына күмән келтіруге болмайды.

ӘДЕБИЕТТЕР ТІЗІМІ:

[1] Байтұрсынов А. Тіл тағлымы. – Алматы: Ана тілі, 1992. – 444 б.

[2] Сайрамбаев Т. Сөз тіркесі мен жай сөйлем синтаксисі. – Алматы: Білім, 2004. – 340 б.

[3] Шәукенұлы К. Синтаксис. – Алматы: Мектеп, 1986. – 123 б.

[4] Құдайбердіұлы Ш. Өлеңдер мен поэмалар. Алматы, 1988. 56 б.

[5] Құнанбаев А. Шығармаларының толық жинағы. 1-2 т. – Алматы, 1954. 262 б.